

中國文學研究典籍叢刊

〔明〕高 棟 編纂 汪宗尼 校訂 葛景春 胡永傑 點校

唐詩品彙

六

中華書局

中國文學研究典籍叢刊

唐詩品彙
六

〔明〕高 棟 編纂 汪宗尼 校訂
葛景春 胡永傑 點校

中華書局

五言排律卷之四

正宗

王維

奉和聖製上巳於望春亭觀禊飲應制

長樂青門外，宜春小苑東。樓開萬戶上，輦過百花中。畫鷁移仙仗，金貂列上公。清歌邀落日，妙舞向春風。渭水明秦甸，黃山入漢宮。君王來祓禊，灞澗亦朝宗。

奉和聖製與太子諸王三月三日龍池春禊應制

故事修春禊，新宮展豫遊。明君移鳳輦，太子出龍樓。賦掩陳王作，杯如洛水流。金人來捧劍，畫鷁去迴舟。花樹浮宮闕，天池照冕旒。宸章在雲漢，垂象滿皇州。

三月三日勤政樓侍燕應制

綵仗連宵合，瓊樓拂曙通。年光三月裏，宮殿百花中。不數秦王日，誰將洛水同。酒筵嫌落絮，舞袖怯春風。天保無爲德，人歡不戰功。仍臨九衢宴，更達四門聰。

三月三日曲江侍宴應制

萬乘親齊（今按，據四庫本，《文苑英華》卷一七二，《全唐詩》卷一二七，當爲「齋」）祭，千官喜豫遊。奉迎從上苑，袂褰向中流。草樹連容衛，山河對冕旒。畫旂搖浦溆，春服滿汀洲。仙樂龍媒下，

神皋鳳蹕留。從今億萬歲，天寶紀春秋。

奉和聖製暮春送朝集使歸郡應制

萬國仰宗周，衣冠拜冕旒。玉乘迎大客，金節送諸侯。祖席傾三省，褰帷向九州。楊花飛上路，槐色蔭通溝。來預鈞天樂，歸分漢主憂。宸章類河漢，垂象滿中州。

春日直門下省早朝

騎省直明光，雞鳴謁建章。遙聞侍中珮，暗識令公香。玉漏隨銅史，天書拜夕郎。旌旗映閭闔，歌吹滿昭陽。官舍梅初紫，宮門柳欲黃。願將遲日意，同與聖恩長。

送李太守赴上洛

商山包楚鄧，積翠藹沉沉。驛路飛泉灑，關門落照深。野華開古戍，行客響空林。板屋

春多雨，山城晝欲陰。丹泉通號略，白羽抵荆岑。若見西山爽，應知黃綺心。

曉行巴峽

際曉投巴峽，餘春憶帝京。晴江一女浣，朝日衆禽鳴。水國舟中市，山橋樹杪行。登高萬井出，眺迴二流明。人作殊方語，鶯爲舊國聲。賴多山水趣，稍解別離情。

奉秘書晁監還日本

（姚合《極玄集》以此篇壓卷。）（今按，《全唐詩》「奉」作「送」，「日本」

後有「國」字）

積水不可極，安知滄海東。九州何處遠，（劉云：「九州」用驕忌「今按，據《史記·孟子荀卿列傳》記載，「驕忌」當爲「鄒衍」語。」）萬里若乘空。向國唯看日，歸帆但信風。鰲身映天黑，魚眼射波紅。鄉樹扶桑外，主人孤島中。別離方異域，音信若爲通。

贈焦道士

海上遊三島，淮南預八公。坐知千里外，眺（今按，《文苑英華》卷一二七、《全唐詩》卷二二七、趙殿成《王右丞集箋注》卷十一皆作「眺」）向一壺中。（劉云：「每作清素可貴。」）縮地朝珠闕，行天使玉童。飲人聊割酒，送客乍分風。（劉云：「奇。」）天老能行氣，吾師不養空。謝君徒雀躍，無可問鴻濛。

和陳監四郎秋雨中思從弟據

嫋嫋秋風動，萋萋（今按，《全唐詩》作「淒淒」）煙雨繁。聲連鳩鵲觀，色暗鳳凰原。細柳疏高閣，輕槐落洞門。九衢行欲斷，萬井寂無喧。忽有愁霖唱，更陳多露言。平原思令弟，康樂謝賢昆。逸興方三接，衰顏強七奔。相如今老病，歸守茂陵園。

過沈居士山居哭沈居士

（今按，「哭沈居士」，《全唐詩》卷一二七，《王右丞集箋注》

卷十二皆作「哭之」）

楊朱來此哭，桑扈返於真。獨自成千古，依然舊四鄰。閑簷喧鳥雀，故榻滿埃塵。曙月孤鶯囀，空山五柳春。野花愁對客，泉水咽迎人。善卷明時隱，黔婁在日貧。逝川嗟爾命，丘井歎吾身。前後徒言隔，相悲詎歲（今按，《全唐詩》、趙殿成《王右丞集箋注》皆作「幾」）晨。

和僕射晉公扈從溫湯

（時爲右補闕。）

天子幸新豐，旌旂渭水東。寒山天仗裏，溫谷幔城中。奠玉羣仙座，焚香太乙宮。出遊逢牧馬，罷獵有非熊。上宰無爲化，明時太古同。靈芝三秀紫，陳粟萬箱紅。王禮尊儒教，天兵小戰功。謀猷（今按，《全唐詩》作「猶」）歸哲匠，辭賦屬文宗。司諫方無闕，陳詩且未工。長吟吉甫頌，朝夕仰清風。

遊感化寺

（今按，《王右丞集箋注》卷十二同此；《文苑英華》卷二三四、《全唐詩》卷一二七皆作

《遊化感寺》）

翡翠香煙合，琉璃寶殿平。龍宮連棟宇，虎穴傍簷楹。谷靜唯松響，山深無鳥聲。瓊峰當戶拆，金澗透林明。郢路雲端迴，秦川雨外晴。鴈王銜果獻，鹿女踏花行。抖擻辭貧里，歸依宿化城。繞籬生野蕨，空館發山櫻。香飯青菰米，嘉蔬綠笋羹。誓陪清梵末，端坐學無生。

奉和聖製幸玉霄公主山莊因題石壁十韻之作應制

（今按，據《全唐詩》

卷一二七、《王右丞集箋注》卷十一，「玉霄公主」當爲「玉真公主」）

碧落風煙外，瑤臺道路賒。如何連帝苑，別自有仙家。此地迴鑾駕，緣溪轉翠華。洞中開日月，牕裏發雲霞。庭養衝天鶴，溪留上漢槎。種田生白玉，泥竈化丹砂。谷靜泉逾響，山深日易斜。御羹和石髓，香飯進胡麻。大道今無外，長生詎有涯。還瞻九霄上，來

往五雲車。

李 白

送儲邕之武昌

黃鶴西樓月，長江萬里情。春風三十度，空憶武昌城。送爾難爲別，銜杯惜未傾。湖連張樂地，山逐汎舟行。諾謂楚人重，詩傳謝朓清。滄浪吾有曲，寄入棹歌聲。

送友人尋越中山水

聞道稽山去，偏宜謝客才。千巖泉灑落，萬壑樹縈迴。東海橫秦望，西陵繞越臺。湖清霜鏡曉，濤白雪山來。八月枚乘筆，三吳張翰杯。此中多逸興，早□（今按，原文模糊難辨，《文苑英華》卷二六九、《全唐詩》卷一七五作「晚」）向天台。

送梁公昌從信安北征

入幕推英選，捐書事遠戎。高談百戰術，鬱作萬夫雄。起舞蓮花劍，行歌明月宮。將飛天地陣，兵出塞垣通。祖席留丹景，征麾拂彩虹。旋應獻凱入，麟閣佇深功。

送紀秀才遊越

海水下滿眼，觀濤難稱心。即知蓬萊石，卻是巨鰲簪。送爾遊華頂，令余發烏吟。仙人居射的，道士住山陰。禹穴尋溪入，雲門隔嶺深。綠蘿秋月夜，相憶在鳴琴。

秋日與張少府楚城韋公藏書高齋作

日下空亭暮，城荒古跡餘。地形連海盡，天影落江虛。舊賞人雖隔，新知樂未疏。彩雲思作賦，丹壁間藏書。（間，一作「滿」。）查擁隨流葉，萍開出水魚。夕來秋興滿，回首意何

如。

宣州九日聞崔侍御與宇文太守遊敬亭余時登響山

不同此賞醉後寄崔

九卿天上落，五馬道傍來。列戟朱門曉，褰帷碧帳開。登高望遠海，召客得英才。紫綬歡情洽，黃花逸興催。山從圖上見，溪即鏡中迴。遙羨重陽作，應過戲馬臺。

贈易秀才

少年解長劍，投贈即分離。何不斷犀象，精光暗往時。蹉跎君自惜，竄逐我因誰。地遠虞翻老，秋深宋玉悲。空摧芳桂色，不屈古松姿。感激平生意，勞歌寄此辭。

江夏使君叔席上贈史郎中

鳳凰丹禁裏，銜出紫泥書。昔放三湘去，今還萬死餘。仙郎久爲別，客舍問何如。涸轍思流水，浮雲失舊居。多慙華省貴，不以逐臣疏。復似（今按，《全唐詩》作「如」）竹林下，叨陪芳宴初。希君生羽翼，一化北溟魚。

春日歸山寄孟浩然

朱紱遺塵鏡（今按，《全唐詩》卷一七三作「境」），青山謁梵筵。金繩開覺路，寶筏度迷川。嶺樹攢飛拱（今按，據詹鏞本《李白全集》，當爲「拱」），巖花覆谷泉。塔形標海月，樓勢出江煙。香氣三天下，鐘聲萬壑連。荷秋珠已滿，松密蓋初圓。鳥聚疑聞法，龍參若護禪。愧非流水韻，叨入伯牙絃。

過四皓墓

我行至商洛，幽獨訪神仙。園綺復安在，雲蘿尚宛然。荒涼千古跡，蕪沒四墳連。伊昔鍊金鼎，何年閉玉泉。隴寒惟有月，松古漸無煙。木魅風號去，山精雨嘯旋。紫芝高詠罷，青史舊名傳。今日併如此，哀哉信可憐。

秋日登揚州西靈塔

寶塔凌蒼蒼，登攀覽四荒。頂高元氣合，標出海雲長。萬象分空界，三天接畫梁。水搖金刹影，日動火珠光。鳥拂瓊簾度，霞連繡栱張。目隨征路斷，心逐去帆揚。露浩梧楸白，霜催橘柚黃。玉毫如可見，於此照迷方。（范德機云：登塔詩，亦悠然而不淫者。）

中丞宋公以吳兵赴河南軍次尋陽脫余之囚參謀幕府因贈之

獨坐清天下，專征出海隅。（范云：真長律起辭也，雄渾而嚴。）九江皆渡虎，三郡盡還珠。組練明秋浦，樓船入郢都。風高初選將，月滿欲平胡。殺氣橫千里，軍聲動九區。白猿慙劍術，黃石借兵符。戎虜行當剪，鯨鯢立可誅。自憐非劇孟，何以佐良圖。（劉云：句句壯，末韻更佳。）

孟浩然

登總持寺塔

半空躋寶塔，晴望盡京華。竹繞渭川徧，山連上苑斜。四門開帝宅，阡陌俯人家。累劫從初地，爲童憶聚沙。坐覺諸天近（今按：《全唐詩》「坐覺」句前有「一窺功德見，彌益道心加」一聯，空

香送落花。（劉云：盛麗高曠，佛地幻語無不具。）

泊宣城界

西塞沿江島，南陵問驛樓。湖平津濟闊，風止客帆收。去去懷前浦，茫茫汎夕流。石逢羅刹礙，山泊敬亭幽。火熾梅根冶，煙迷楊葉洲。離家復水宿，相伴賴沙鷗。

西山尋辛諤

漾舟尋水便，因訪故人居。落日清川裏，誰言獨羨魚。石潭窺洞徹，沙岸歷紆餘（今按：《全唐詩》作「徐」）。竹嶼見垂釣，茅齋聞讀書。款言忘景夕，清興屬涼初。回也一瓢飲，賢哉常晏如。（劉云：自言其趣，亦頗簡淡。）

送朱去非遊巴東

（今按，「朱」，《全唐詩》作「張」）

硯山南郭外，送別每登臨。沙岸江村近，松門野（今按，《全唐詩》作「山」）寺深。一言余有贈，三峽爾相尋。祖席宜城酒，征途雲夢林。蹉跎遊子意，眷戀故人心。去矣勿淹滯，巴東猿夜吟。

陪張丞相自松滋江東泊渚宮

放溜下松滋，登舟命楫師。詎忘經濟日，不憚沍寒時。洗幘豈猶古，濯纓良在茲。政成人自理，機息鳥無疑。雲物吟孤嶼，江山辨四維。晚來風稍緊，冬至日行遲。獵響驚雲夢，漁歌激楚辭。渚宮何處是，川暝欲安之。（劉云：工處渾然，不似深思者。）